

Na sajón da d'invern ezelenta

I prumes dac de jené moscia n +34% de prejenzes confront al an passà. Aon sentù i raprezentanc di hotelieres e di fitacartieres de Fascia



Prumes de mèrz del 2023: Pra de Sornòl l'è senza neif.

Chesta che l'è do a jir a piz se pel ben dir che sie na sajón da d'invern dalbon ezelenta. Da Nadèl en ca l'è stat pien de ghesc. Sot la festes, desche zenza, l'è stat n muie de taliegn ma dapò la val se à empieni endodanef de foresc.

Filippo Debertol: i dac é più che positives

Filippo Debertol, president ASAT Val de Sora, conseier de l'ASAT de Trent e component del Comitad Esecutif de l'Apt de Fascia ne à dit che i se à troà proprio enstadi per fèr n prum bilanz. «La sajón la è fantastica, i dac é duc più che positives – l'è dit Debertol. Chest an no aon abù l'busc de la pruma doi setemènes de jené, che per solit l'era piutost chiet. N muie de ghesc é rué te Fascia a jir coi schi ajache da autra pèrts no se podea. I prumes dac reiona chièr. Tel meis de jené, confront al medemo meis del 2022, l'è stat +28% de prejenzes a Cianacel, +30% a Ciampedel, +60% a Mazin, +40% a Sèn Jan, +33% a Soraga e a Moena. Te Fascia l'è stat donca n +34% de prejenzes confront al an passà. Dac dalbon da marevea a pissèr che jené l'è semper stat n meis con manco busiamet te val.

«Se pel dir che la è jita amò miec che i egn dant del Covid – ne à dit Debertol. Se meton a confront l' meis de jené de chest an col jené del 2020, amò canche no l'era ruà l' Covid, Fascia à abù n +6% de prejenzes. Endèna l'è amò richiestes per l' meis de mèrz, l'è bon fin ai 26 dapò no n'è più e n muie de hotie serarà. La jent sent ciaut e la preferesc jir al lech o al mèr. I impianc portamont tegn avèrt fin ai 10 o 11

de oril. Sion do che rejonon sun co fèr a slongèr fin da Pèscia, cognon troèr vèlch event particulèr che chame jent a vegnir coi schi fin a la fin de la sajón percheche l'è n gran sforz tegnir avèrt. Enveze chest an la è jita miec col personal – à jontà apede Debertol – l'è stat più sori l' troèr. Me peisse che la rejon sie stat che l' nef Goern à dezidù de tor demez l'redit de zitadinanza, la jent à pissà de se dèr la mans dintorn, l'è ruà mail e curriculum de jent che chieria lurier. Ence da chest pont de veduda se à lurà miec.»

Cristina Donei: i ghesc taliegn taca a fèr demò dotrei dis ence ti cartieres.

Enscin ades la sajón da d'invern la è stata positiva ence per i fitacartieres. «La è jita n muie ben sote Nadal e ence jené e firè – à dit Cristina Donei, presidenta de la Sociazion Fitacartieres de Fascia – dapò con marz, do i primes diess dis, l'è mingol dut che se ferma. Giò pense che sie percheche l'è più ciaut e no l'è fiocà trop, somea che l'aisciuda la tache inant. Chest an per via che Carnaval l'è stat de firè

se à mingol dut antizipà, i ghesc taliegn à jà fat soe ferie e defat la setemana de Carnaval l'è stat pien desche da Nadal. Chest an se se n à adat più che zenza che i taliegn i fasc manco di, no i fasc più na setemana entria ma i preferisc far 3 o 4 not, ence ti cartieres. I fitacartieres à cognù se adatar, no l'è sori, ma se se vel fitar se cogn bele ge jir encontra a siò besognes. I ghesc foresc enveze, ajache i vegn da dalonc, i seghita a domanar la setemana entria. Chest invern l'è ruà mingol de dedut: cecchi, polaches, ence slovens, te la val de sot. I disc ben che i se spetasse più nef te paes ma di portoes no i se lamenta, i è amò bié. Giò pense che se cogne ge enjegnàr percorsc che i pode far ence fora de sajón, se volon tirar inant più al lonch. Giò veje che chi che vegn dotrei di i va de più a pe, i va na di a le terme e dapò a far valch raida. La mont taca a pajer semper de più ence fora de sajón. Podon dir che la è jita ben, e faziile sarà ence chest istà, i à jà tacà de jené a domanar per aost.»

Monica Cigolla



L'piaz pien de auti tedant al impiant de Belvedere.

FASCIA/2

»N gran sforz, ma i resultac paa fora«

Enceben l' gran smaorament di cosc de l'energia e la malsegureza del scomenz de sajón, i impianc portamont é vejins a la sajón record del 2019/2020

La sajón da d'invern 2023 la è stata ezelenta per desvalives setores del turism: hotie, fitacartieres, restoranc, ma ence e soraldut i impianc portamont. «Al scomenz siane cruziè per l' smaorament di cosc del eletrich e del gas e per la menciàza de prenotazion – à dit Claudio Bernard president de la sozietà de impianc portamont Ciadenac – no se saea coche la fossa stata se ence del 2023 i cosc de l'energia aessa seghità a crescer. Enveze dapò l'è tacà a ruar

la jent e ence i foresc, l'è ruà deretorn i polaches e i rusc. L' temp ne à didà con la neif al scomenz de la sajón e dapò col freit per far la neif artificia. Duc à podù lurar al mascim e aon podù far resultac ezelenc. Podon dir che aon fat na media de n +20% confront al an passà, sion vejins ai numeres de la sajón record 2019/2020. Sion bravi a tegnir fora percheche l'è n moment che dut muda, vegn do ca n nef modo de far turism, sion tedant a n mudament generazonal

emportant e a neve tendenze de far turism. La jent stasc manco dis, la preferesc far più ferie fora per l'an, la se mef magari trei oute al an per cater o cinch dis. Enceben dut chel che l'è sozedù e te na situazion internazionala coscita delicata, la jent à endò voa de jir sa mont. L' setor di impianc portamont do l' Covid à abù na reazion positiva, nesciugn se à tirà endò, aon enjignà neif, portoes, semper batui e en bone condizion. Ence Ciampedie – jontà apede Bernard – che l'è na zona serada, con soa spezifità de perferida che se ouc soraldut a le familie, l'è fat na sajón ezelenta. Ciampedie serarà ai 26 de marz, no sion cruziè per la pecia neif, ne à didà chisc ultimes dis de freit a far na bona sola, daperdud l'è portoes beliscimes. Sion contenc percheche do doi egn de malsegureza la è endò jita ben, l'è emportant ence per i investimenc percheche no cognon ser fermar.»



Mencia la neif te paisc ma i portoes é amò n muie bie.

Monica Cigolla